

Riaan Eksteen se Opmerkinge oor dr Henry Kissinger op sy 100ste verjaardag, 27 Mei 2023

Om 100 jaar te bereik is 'n besondere geleentheid. Om dit te kan bereik met 'n intellek wat nog skerp en ontledend is oor wêreldgebeure, politieke tendense en streekskonflikte waarvan vele staatslui en kundiges oor staatkunde telkens nog kennisneem, is 'n uitsonderlike prestasie.

Kissinger is in Duitsland gebore. Op jeudige ouderdom verhuis hy en sy ouers na die VSA. In sy akademiese loopbaan wentel sy teorieë en beleidsuitgangspunte om die begrip wat hom bekend maak. Hy formuleer dit as Weltanschauung – wêreldbeskouing. Vir hom was alles 'n groot legkaart met elke stuk wat 'n kritieke, maar kenmerkende rol na 'n enkele einde gespeel het – die VSA se opkoms as onbetwiste wêreldleier. Hiermee het hy noukeurig die grondslag gelê vir sy uiteindelijke opkoms as 'n leidende gesag oor strategiese en geopolitieke beleid vir presidente van beide politieke partye. Dit was dus nie verbasend dat President Richard Nixon hom in 1968 as 45-jarige as sy nasionale veiligheidsadviseur aangestel het nie. Kort daarna het hy minister van buitelandse sake geword en toe Nixon weens Watergate bedank het, het President Gerald Ford hom in laasgenoemde portefeulje aangehou. Hy het hierdie twee presidente vir agt jaar gedien.

Kissinger het feitlik elke krisis of geleentheid wat ons vandag in die gesig staar aangeraak of beïnvloed – en langs die pad het die wêreld verander soos min ander mense wat nog ooit tot regeringsampste verkies was.

Die oorlog in Viëtnam en die groot toewyding van Amerikaanse lewens en militêre mag het feitlik alles vir 'n dekade in die VSA oorheers. Hy het op 'n onverbiddelike wyse met sy vredesonderhandelinge volhard met wat hy ontwerp het om die ontknoping daarvan te verseker. Dit sou uiteindelik lei tot die VSA se onttrekking en binne twee jaar en Noord-Viëtnam se oornam van die hele land. Dit het gelyk of Ho Chi Minh en Hanoi “gewen” het. Trouens, die wyse waarop hierdie oorwinning uiteindelik gestruktureer was, het gelei tot die skepping van 'n nasie wat vandag 'n bolwerk van kapitalisme is en 'n mees gewaardeerde vennoot, indien nie 'n regstreekse bondgenoot nie van die VSA geword het. Vir sy vredesonderhandelinge het hy die Nobelprys vir vrede ontvang.

Kissinger was terselfdertyd besig om na ontspanning met die Sowjetunie te beweeg en die eerste stappe in die rigting van volle diplomatieke betrekkinge met China. Hierdie toenadering tot die Sowjetunie het gelei tot skerp vermindering in strategiese kernwapenarsenale waarvan die instandhouding en uitbreiding 'n groot las op die Amerikaanse begroting was, as ook 'n ernstige bedreiging vir globale stabiliteit, selfs dalk oorlewing. Sy reeks geheime besoeke aan China het die weg vir Nixon se besoek gebaan en die uiteindelijke erkenning van China.

Dan was daar die Midde-Ooste. In Oktober 1973 is Israel op Yom Kippur, die heiligste dag van die Joodse jaar, binnegeval deur 'n koalisie van Arabiese leërs onder leiding van Egipte en Sirië, wat uiteindelik slegs ten duurste deur Israelse magte verslaan is. Kissinger wat die belange in terme van diplomatie die toegang tot groot Arabiese oliereserwes en die mense van die area basies verstaan het, het 'n reeks diplomatieke reise begin. Hy het onvermoeid heen en weer gereis tussen Israel en sy buurlande in 'n poging om 'n blywende vrede te bewerkstellig. Die term “shuttle diplomacy” het hier sy oorsprong gevind. Alhoewel sy pogings nooit tot totale vrede in hierdie onstabiele streek gelei het nie is Israel nog nie weer deur enige nasionale weermag binnegeval nie.

Suider-Afrika het ook nie sy aandag ontglip nie. Drie persoonlike ontmoetings met Eerste Minister John Vorster in die middel-1970's was ten doel om die Rhodesiese kwessie te ontknoop. Dat hy nie daarin geslaag het nie kan nie alles voor sy deur gelê word nie. Die veelvoud van akteurs wat betrokke was en wou wees, was teenproduktief. Dan het President Ford die verkiesing teen Jimmy Carter in November 1976 verloor – maande na Kissinger en Vorster se derde ontmoeting.

Kissinger het voortgegaan om met soveel van dergelyke kwessies besig te bly – grootliks deur die private konsultasie-aktiwiteite wat hy in 1982 van stapel gestuur het en uiteindelik tot 'n multinasionale kolos uitgebrey het wat steeds rigtinggewende advies verskaf en alreeds 'n konstante stroom van meer as 100 boeke en geskrifte die lig laat sien het.

In 2015 het die tydskrif “Foreign Policy” hom as die doeltreffendste minister van buitelandse sake van die VSA die afgelope 50 jaar bestempel. Sedertdien kon geen een van sy opvolgers daarin slaag om naby die statuur en invloed van Kissinger te kom nie.

Inderdaad, terwyl Kissinger formeel vir slegs twee presidente gewerk het, het skaars 'n enkele leier van enige van die politieke partye versuim om met hom te konsulteer. So ook reekse wêreldleiers aan elkeen van wie hy nog nooit opgehou het om die onontbeerlike waarde van sy insigte te verskaf nie .

Kissinger glo steeds ten diepste in die noodsaaklikheid om die grondbeginsels van enige opponent se ambisies en sensitiwiteit te verstaan. Iets wat blykbaar baie hedendaagse leiers ontwyk, veral in die VSA. Die huidige Amerikaanse bestel sal goed doen om diep na te dink oor Kissinger se jongste waarskuwing: Amerika se toenemend desperate pogings om sy sterwende hegemonie te bewaar, sal nie die land red nie. Hulle sal eerder net die agteruitgang daarvan versnel – en die wêreld in chaos dompel.

Ek was bevoorreg om Kissinger drie keer te ontmoet. Twee maal in laat 1970's in New York toe ek ambassadeur by die VN was. Dan het ek hom en sy vrou, Nancy, vir drie dae vergesel tydens hul besoek aan Suid-Afrika en Namibie in Augustus 1982. Ons besoek aan Etosha was vir hulle 'n hoogtepunt en vir my 'n onvergeetlike ervaring om heelwat ure na sy sienings te luister wat hy vrylik en met sorgsaamheid aan my verduidelik het.